



Adalberto Daorgnani a la età di 88 agns al mûr.

Di chê zornade che si jere maridade sô gnece Ada, il Cont al veve cjolte a vore cun se une brave frute, cognossude a Roccalpiano come Gjinute. E jere pôc plui di une frute, e veve finît tredis agns. Une brave zovine che e jere a stâ un moment prime de ultime voltade. Prin di rivâ a viodi il splaç dal cjistiel, la sô cjase e jere daûr de cjase di Pieri, un dai colonos plui vielis. Il siôr Cont, al jere propit content di vê dongje chê brave frute. E jere diventade la persone plui fidade che al varès podût cjatâ.

Adalberto, dopo la muart di so fradi Denêl, al jere simpri plui avilît, ma chê frute i tirave sù il morâl, ancje parcè che e jere tant legre e vivarose, une maravee di sintî a cjantâ tal cjistiel.

Gjinute, cuant che e rivave la matine, e lave a saludâ il cont. Al bastave cjalâlu intai voi par capî che al jere content. Gjinute ogni matine e tucave te puarte dal siôr e e jentrave a dâi il bundi, no si dismenteave mai. Une bieles zornade cuntun soreli masse biel par sei il mêsi di Setembar, Gjinute, rivade li dal Cont e va a tucâ come simpri te puarte de cjamare, ma chel i rispuint cuntune vôs grocje, che si fadie a capî cè che al diseve. Gjinute, une volte jentrade,

si cjate denant une persone che e fâs fature a cognossi: al jere dut taponât sot de cuvierte, cuntune muse rosse, paonace. A pene che Gjinite si sente sul ôr dal jet, come che e faseve simpri, il siôr Cont i dîs: «Gjinite, la mê frute cussì biele e cjarine, o 'nd ai pôre che o soi dongje di chê zornade che 'nd à la gnot plui lungje de mê vite».

«Siôr Cont, che nol stei a butâsi jù, no sin noaltris i parons de nestre vite. No podin savè noaltris cuant che e sarà la nestre ore, o vin dome di acetà di fâ la sô volontât. Par chest il nestri plevan Roberto, ogni domenie a messe, no si dismentee mai di fânus dîsi il Pari Nestri par furlan».

«A mi mi fâs plasê che tu sês credente, ma jo o vuei domandâti un plasê, tu stâ a scoltâmi ben ce che cumò ti dîs: vierç chel armâr tant vecjo, che al jere ancjemò di puare mame, cjale dentri tal font, cussì o viôt se tu âs bon voli; al è un bûs, ch'al è taponât cuntun grop».

Gjinite e va a viodi e i dîs al cont che lu à cjatât.

«Cumò tu met dentri il dêt tal bûs e alce la bree».

Gjinite e fâs come che i a dit il Cont.

«Cjape sù chê borse zale di piel che e je poiade, e tu vâs di corse a cjase tô, tu la platis dentri tal paion dal to jet, ancje se tu viodis cualchidun, tu no stâ fermâti, va di corse e fâs cemût che ti ai dit. Po dopo tu vâs a cirî il gno colono Pieri e tu i disis che jô o soi tant malât e che al à di lâ a clamâ ancje chel altri gno colono Jacum. No stâ dismenteâti di diûr di clamâ ancje il nestri plevan Roberto. Viôt di no pierdi chê borse parcè che dentri al è un biel valôr in monedis di aur. Jo o vuei che tu lis puartis cjase tu parcè o sai che tu âs bisugne. Cheste e jê la mê volontât».

Gjinite e jere lade dongje dal cont simpri plui avilide e cui voi no rivave a viodi, a fuarce di lagrimis.

Ma Adalberto i dîs: «Va vie cumò e fâs dut ce che ti ai dite, tu mertis dut ce che ti ai dât e ancje di plui, volarâ dî che tu prearâs par me».

Gjinite e cjape sù la borse e e va drete a cjase sô. Dopo vêle metude tal pajon, come che i à dit il Cont, e va a cirî Pieri. Pene rivade su la stradalute dal cjistiel lu viôt che al sta tornant de campagne cul falcet su la spale, i va incuintri e i conte dut ce che i veve dit il cont. Pieri i diis: «Gjinite tu va a cjase tô parcè che no son robis bielis, no à di restâ une zovine come te a assisti un muribont. Jo cumò o voi a clamâ il gno amî Jacum».

Gjinute i torne a disi di no smenteâsi di lâ a clamâ don Roberto.

«Tu no stâ a preocupâti, i pensi a dut jô».

Pieri al va jù di corse pe stradelute dal cjistiel, cuant che al rive là di chel altri colono al è dut sudât e nol rive neancje a cjacarâ.

«Cumò», al dîs Jacu, «jo o disarès di lassâ pierdi di lâ a cirî il plevan, lin sù a la svelte se o volin cjatâ ce che o pensin nô».

Dopo un moment a jerin denant de cjamare dal Cont, daspò vê tucât a jentrin cence spietâ la rispueste. Adalberto al jere ros come une bore di fûc, e cun chê pocje vòs che al veve ur dîs: «Il plevan lu veiso clamât?»

«Al a dit cal rive subite».

Dopo, ducj e doi i colonôs si dan une cjalâde e un di une bande e un di chê altre a tachin a sgarfâ da par dût.

In curt e je dute la robe dai armârs ator pe cjamare.

Il Cont al è simpri plui fûr di sé; aromai chei doi furbacjons no lu stan plui a sintî. Fintremai che il Cont, cun chê di alçâ la vòs, al jeve in senton sul jet e daspò cuntun grant respîr al cole parsore il cussin e al ferme di tirâ flât.

I doi ladrons a jerin simpri plui rabiôs e a blestemavin un plui di chel altri

In chel a sintin a clamâ, e cun chè si decidin a lassâ dut e a van a viodi cui che al è rivât.

di Plume di ingjstri